



UPA 2026/108

5/5-2026

Hans Erik Enoksen

Illusaaqarneq pillugu ataatsimoortumik aqqissuusseqqinnissamut, tassungalu atatillugu pisortat aningaasalersuinermit qularnaveeqqusiisarnissaanut, aammalu akitsuutisunik apparsaagallarnissanik, nuna tamakkerlugu isigalugu periusissioornissamut Naalackersuisut peqquneqarnissaannik Inatsisartut aalajangiiffigisassaattut siunnersuut. Aqqissuusseqqinnissamut pilersaarut Inatsisartunut saqqummiunneqassaaq aalajangiiffigisassanngorlugulu 2027-mi upernaakkut ataatsimiinnermi (UPA27).

(Inatsisartunut ilaasortaq Erik Jensen, Siumut)

(Siullermeerineq)

Inatsisartunut ilaasortap Erik Jensenip siunnersuutaanut qjanaq.

Inissianik niuerfik oqimaaqatigiittoq inuiaqatigiinni ingerlalluurtuni tungaviuvoq. Inissianik niuerfiup sapinngisamik killeqanngitsumik unammilleqatigiiffiulluni, erseqqissuulluni, privatimillu annertuumik peqataaffigineqarluni niuerfiunissaa Demokraatinut aalajangiisuuvoq. Privatimik niuerfik ingerlalluortoq aqqutigalugu innuttaasunut pitsaanerpaanik, atasinnaasunillu aaqqiissutisunik pilersitsisinnaalluta upperaaput. Ilutigisaanik amerlanerusut namminneerlutik illuuteqarnissaminnut periarfissaqarnissaat ersarissumik kissaatigaaput. Illu nammineq pigisaq toqqissisimanermik, akisussaassuseqarnermillu pilersitsisarpoq.

Taakkua oqaatigereerlugit, inissianik niuerfik nunami tamarmi assigiinngimmat aamma nassuerutigisariaqarparput. Sumi najugaqarneq apeqqutaalluni illuliortiternernut aningaasalersuinissamut periarfissat annertuumik assigiinngillat. Tamanna tunuliaqutaralugu innuttaasut ilaasa illutaarnissartik ajornartittarpaat, naak akileerusussuseqarlutillu akissaqartikkaluarlugu. Tassani pisortat suliaasaqarput. Niuerfimmuut taartissatuunngitsoq, kisiannili akimmiffinnik piiaaqataanissamut, sinaakkutinillu pitsaanerpaanik pilersitseqataanissamut siunnerfilimmik tapersersuinissamut.

Tamanna pillugu ineqarnerup nukittorsarneqarnissaanik anguniagaq pitsaasutut isigaarput. Ilutigisaanilli isumaqarpugut, paasissutissanik aamma akisussaassusilimmik tunngaveqartumik aalajangiinissarput aalajangiisuusoq. Pingaarutilinnik, annertuunillu aqqissuusseqqinnerni aningaasatigut, inuiaqatigiinnullu kingunissaannik tamanik ilisimasaqarnissarput pisariaqarpoq. Nukingiullugu aalajangiinerit, ajornartorsiutisunik nutaanik pilersitsisinnaasut pinaveersaassavagut.

Tamanna pillugu Naalackersuisut allannguutissatut siunnersuutaat pingaarutilittut, akisussaassuseqartutullu isigaarput. Siullermeerlutik pisisunut atugassarititaasunik peqqissaarutamik misissueqqissaarnissaq, siunnerfilimmillu suliniutisunik naliliinissaq eqqortumik aalajangiinissatsinnut pitsaanerujussuarmik tunngavississavaatigut. Aningaasatigut akisussaassuseqarneq atatiinnarlugu amerlanerusut piginnittuunissaminnut periarfissaqarlutik inissianut niuerfik oqimaaqatigiittoq

UPA 2026/108

J.nr 00.00.00/26FM-LABU-00108

Qupp. 1



qulakkeerusukkutsigu, taamatut periuseqarnissaq pisariaqartipparput.

Tamanna tunuliaqutaralugu Naalackersuisut allannguutissatut siunnersuutaat Demokraatit
tapersorsorpaat, nangillugulu Sanaartornermut Ataatsimiititaliami oqaluuserineqarnissaa inassutigalugu.